

Sur Dirk Jasinski – niev plevon en Lumnezia

■ (anr/gc) La suprastonza dalla nova pleiv catolica romana da Lumnezia ha elegiu sur *Dirk Jasinski* sco niev plevon-administratur dallas pleivs reunidas: Cumbel/Peiden, Lumbrein, Suraua e Vrin. El daventa cun calonda mars 2018 successur da sur *Markus Domeisen*, plevon da Lumbrein e Vrin dapi 2013. Lez surpren l'auter onn la pleiv da Sursaissa/Mundaun. Dimora pren sur Jasinski a Lumbrein. El ei leu dil reminent il quart plevon che vegn dapi 1930 giu d'Andiast. Legreivel ch'ins ha saviu occupar la pleiv reunida vacanta da Lumnezia aschi spert.

Sur Dirk Jasinski, il niev plevon dalla pleiv catolica romana da Lumnezia, cun ses 867 fideivels, ha 50 onns e deriva dalla Tiaratudestga. Suenter studis a Münster en Vestafalia e Tübingen ha sur Jasinski studegiau teologia a Cuera. Da 1995–97 ha el fatg pratica pastora-la a Regensdorf. Suenter l'ordinaziun

1997 a Cuera ei sur Jasinski daventaus vicari a Dübendorf. 2001 ha el surpriu la pastoraziun dallas pleivs d'Andiast e Siat e naven da 2012 era quella da Rueun. El plaيدا e scriva fetg bein romontsch.

Co va ei vinavon cun la pastoraziun dallas pleivs che sur Jasinski banduna? Concernent Andiast, vischnaunca fusiunada cun Breil, seigien ins en contractivas da fusiunar era cun la pleiv da Breil. Previu fuss allura ch'il plevon da Breil, sur *Marcel Köhle*, daventass era plevon-administratur d'Andiast. La pastoraziun da Rueun e Siat vegn surdada cun l'entschatta mars 2018 a sur *Tomasz Arkuszewski* ch'ei naven da Danniev plevon-administratur da Ruschein, Ladir e Pigniu. La pleiv da Sevgien vegn egl avegnir pastorada da Glion ano. Aschia ein tuttas pleivs, vegnidas vacantas uonn giu la Foppa ed en Lumnezia, puspei occupadas – sco igl ei vegniu communicau.